

GUICHI URUPE BË SAN PABLO APÓSTOL USE'ELA'NË'N LAO TIMOTEO

Use'ela' Pablo guichi ni lao Timoteo

¹ Nè'èdi', Pablo, naca' apóstol quie Jesucristo con cabè' uljo Diuzi nè'èdi' conforme con ca una Diuzi hue'nè' yela' naban tuzioli nutezi ben' hue tuzè len Jesucristo.

² Timoteo, bia' guichi niga pse'ela'n laolo'. Nezilo' nadyè'èda' luè', raqueda' luè' ca zī'ina'. Rulidza' Xuziro Diuzi lènè' Señor quiero Jesucristo ta huela'iyaquè' yeyèchi'la'adyi'yaquè' luè' cuèchियाquè' chizi lu'u guicho laxta'olo'.

Reya'ala' quixogue' Timoteo yaca benè' di'idza' quie Cristo

³ Yugo dza, yugo yèla, rulidza' Diuzi rëpa'nè' diuxcalelo' por luè'. Lëscan', por tu parte quia' nè'èdi', rua' dyin quie Diuzi birao pensari quia' nè'èdi' xquia. Cana' bërè xuzixta'ohua', bëyaquè' dyin quie Diuzi, biudao pensari quieyaquè' leyaquè' xquia.

⁴ Na'ra rezala'adya' cabè' guquelo' bayèchi' caora unia' luè' bazeya'a. Lena' re'enda' guida' ideyuba' luè' tatula, porque lega redaohueda' sulia' luè'.

⁵ Nezda' cabè' ruelo' rnaolo' xneza Jesús du guicho du la'adyo'. Tanëro unao zña'gulo' Loida

len zña'lo' Eunice xneza Jesús. Reyula'adya' lëscan' luë' naolo' xneza Jesús ca leyaquë'.

⁶ Quie lena' rnia' luë': Reya'ala' huelo' bala ca ta banegunne Diuzi luë' caora uxuba' na'a guicholo' bdë' Diuzi luë'.

⁷ Bire'en Diuzi idzebiro, re'ennë' huero tzutzu huala laxta'oro, re'ennë' idyë'ero laguegyiro, re'ennë' tzu'uro pensari dya'a.

⁸ Biyedue'lo' inëlo' cule quie Señor quiero. Lëscan' biyedue'lo' dan' dia' lu'u dyiguiba por nun quie dan' naohua' xneza Cristo cabë' luë'. Lëscana' biidzebo' cati huelë benë' luë' bizinaquezi. Siempre gun Diuzi fuerza valor quio' ta suelo' sulo' chizi chi biti'tezi ta usaca benë' luë' porque dan' rguixogue'lo' xti'idza' Diuzi.

⁹ Ulio Diuzi ra'o beguibinë' laxta'oro, porque re'ennë' gacaro ben' la'iya quienë'. Cala yela' ben' huen quiero ulio Diuzi ra'o, dechan' ulionë' ra'o bënnë' cule quiero, porque cana' re'ennë' huenë' quiero nedyë'ënë' ra'o ca nedyë'erë Jesucristo ra'o. Tu binegata' yedyi layu, tu na' zu Diuzi nadyë'ënë' ra'o.

¹⁰ Tali blu'e Diuzi nadyë'ënë' ra'o, porque use'ela'në' Señor quiero Jesucristo ta yeyudyi yedu quie yela' guti quiero. Lëscan' lao na'anë' guta' yela' neban quiero tuzioli por nun quie xti'idza' Diuzi.

¹¹ Bë Diuzi në'ëdi' nombrado ta tzetixogui'a benë' xti'idza' Diuzi. Quie lena' use'ela'në' në'ëdi' naca' apóstol, naca' maestro.

¹² Quie lena' redzagalaohua', pero biredue'da' porque nuebë'da' Cristo, naohua' xnezë'. Nezda'

naca Cristo ben' de yela' huaca quie, rna'në' në'ëdi' tu lala zua' yedyi layu hasta idyin dza gaca juicio lao yedyi layu.

¹³ Biusanla'adyo' inaolo' cabë' psëdia' luë' quie xti'idza' Diuzi. Unao xneza Jesús du guicho du la'adyo', idyë'ëlo' laguedyo' nun quie dan' naco' tuzë len Cristo Jesús.

¹⁴ Lao na'a Bichi Be quie Diuzi, ben' yu'u lu'u guicho laxta'oro, gapo' cuidado bigala'adyo' uzulo' xti'idza' Diuzi ca ta bdë'në' luë'.

¹⁵ Luë' nezilo' apanla'adyi' yaca ben' nita' yaca ciudad nebaba Asia në'ëdi'. Cana' apanla'adyi' Figelo len Hermógenes në'ëdi'.

¹⁶ Rulidza' huela'iya Diuzi familia quie Onesíforo, porque zë lasa pxela'adyi'në' në'ëdi'. Biredue'në' quia' naca' preso dia' lu'u dyiguiba.

¹⁷ Cati bedyinnë' ciudad Roma udanë' beguilonë' në'ëdi' hasta bedzelenë' në'ëdi'.

¹⁸ Rulidza' Diuzi yeza'la'adyi'në' quienë' dza gaca juicio lao yedyi layu. Dyë'ëdi nezilo' tazë gualënë' ra'o dza udaro ciudad Efeso.

2

Naca ben' nao xneza Jesús ca quie soldado dya'a

¹ Luë' naco' ca quie zī'ina'. Tana' nia' luë' huelo' bala ca tu ta banegunne Cristo Jesús luë'.

² Na'ra cabë' di'idza' apsëdia' luë', re'enda' usëdio' ben' tula, pero ben' nezo' uzu di'idza', ben' nezo' usëdi dyë'ëdi. Huelo' mandado usëdijë' yaca benë' cabë' di'idza' apsëdia' luë'.

³ Reya'ala' sēlo' tzutzu huala ca quie soldado dya'a quie Jesús cati rusaca benē' luē' bizinaquezi.

⁴ Bireya'ala' hue soldado dyin tula cati ruenē' servicio quienē'. Reya'ala' huenē' puro ca mandado rue xa'ne cuenda yeyula'adyi' xa'ne lēbē'.

⁵ Lēscana' nacarē quio' ca quie ben' rguitulē pelota, bihuenē' gan chi bihuenē' cabē' na reglamento quien.

⁶ Lēscana' nacarē quio' ca quie ben' guza na quie, ben' rue dyin guixi', napanē' derecho si'nē' usecho quien.

⁷ Huu' pensari cabē' nia' luē', na'tera huacalē Diuzi luē' ta tzioñe'elo'n.

⁸ Bigalala'adyo' Jesucristo, zī'isuba' rey David. Naquē' ben' aguti, na' bebannē' tatula aberoguē' gan' yu'u ja ben' huati. Lena' rguixogui'a benē'.

⁹ Nun quie rguixogui'a benē' xti'idza' Diuzi, redzagalaohua' pquioyaquē' ni'a na'a caden. Ca quie ben' bē tamala, bëyaquē' quia'. Pero bisaque'yaquē' uquioyaquē' xti'idza' Diuzi.

¹⁰ Pues rzueda' con biti'tezi tamala raca quia' cuenda yega'nnan dya'a quie yaca ben' ulio Diuzi, na' gata' yela' neban quieyaquē' tuzioli tzasulēyaquē' Cristo Jesús tuzē.

¹¹ Tali nacan de que:

Chi zuro puesto inaoronē' ba'ala'cazi ruen zūdyi guti benē' ra'o, na'tera huezi'nē' ra'o huetzasulēronē' tuzioli.

¹² Chi suero cati rue ja ben' quiero bizinaquezi, na'tera gunnē' lato quiero inabē'ro conlē lēbē'.

Chi usebi'ro lëbë', lëscana' usebi'në' ra'o.

¹³ Ba'ala'cazi birue quiero xti'idza' Diuzi, lëbë' sí, rucazi quienë' xti'idzë', porque bisaque' birue quienë' xti'idzë'.

Reya'ala' huero ta yeyula'adyi' Diuzi

¹⁴ Gacalao' yaca ben' nao xneza Jesús ta bigalala'adyi'yaquë' cabë' nia' niga. Lëscan' huegadyo'yaquë' ta bihuejë' cuenda quie yaca ben' raxe tzu'u huenë rdilayaquë' quie bi di'idza' rnën lë'ë guichi ley quie Diuzi. Pues bibi zaca'n tzu'uyaquë' huenë' conlë leyaquë'. Tuzi ca huen quieyaquë', huatondo pensari quiejë' chan' uzënağajë' quiejë'.

¹⁵ Bë quio' xti'idza' Diuzi du guicho du la'adyo' cuenda ilë'ë Diuzi cabë' ruelo' tanun quienë' naco' ben' rue dyin dya'a, ben' rguixogue' di'idza' li quienë' ta yu'u ni'a xnezi. Chi huelo' cana', na' huario dyin quio' dya'a, bigata' yela' stu' quio' lao Diuzi.

¹⁶ Bihuu' cuenda quie yaca ben' rna di'idza' bibi zaca'n, di'idza' dachizi, porque yaca ben' rna cana', tu dza, tu dza, ziojë' ruejë' mazara tamala.

¹⁷ Naca di'idza' quiejë' ca quie hue' baru'udzo'. Cana' naca quie Himeneo len Fileto.

¹⁸ Uquixiyaquë' nayaquë' biyeban yaca ben' huati. Cana' aptondojë' pensari quie bala ben' nao xneza Jesús.

¹⁹ Pero bisaque' te cana'zi ta bë Diuzi, yega'nnan tuzioli. Pues cani nan lë'ë guichi la'iya quie Diuzi: "Nezi Diuzi nu ben' naca ben' quienë'." Lëscan' nan: "Yugulu ben' nao xneza Jesús, reya'ala' usanjë' tamala."

20 Uzëcara nago' ta inia' luë' tu di'idza'. Lu'u yu'u quie ben' uña'a de zë cue' taza. De taza de oro, len de plata, len de yaga, len de yu. Na'ra nu taza de oro o de plata zaca'n za'ala'. Pero yaca taza de yaga o de yu, lë'ëti'zi zaca'n. Lëscana' ra'o, ben' nao xneza Jesús, naca quiero ca quie zë cue' taza.

21 Naca quiero ca quie nu taza zaca'n za'ala', zaca'ro lao Diuzi, huero dyin quienë'. Ruen dyabë' quiero bihuero tamala, na'ra baneyëiro huero dyin dya'a, huero dyin quie Diuzi.

22 Pues gapo' cuidado, bihuelo' ca rue bala bi' ru'abe, porque rguiloyacabi' ga huejabi' tamedian. Mejorla huelo' ta yeyula'adyi' Diuzi, sudyi'ilëlo'në' mazara, idyë'ëlo' laguedyo', huelo' cue' chizi laxta'olo', porque cana' rue ben' rulidza Diuzi du guicho du la'adyi', ben' nayëri laxta'ohue.

23 Bihuelo' cuenda quie ben' rnë di'idza' bizũ, porque dyë'ëdi nezo' huaca dila yaca benë'.

24 Nacaro ben' rue cabë' re'en Diuzi. Quie lena' bireya'ala' tzu'ulëro benë' huenë. Reya'ala' gapala'nro yugulu benë'. Reya'ala' suro puesto usëdiro laguedyiro. Reya'ala' huezëla'adyi'ro lëro laguedyiro.

25 Lëscan' reya'ala' hue'lëro ben' rdza' ra'o di'idza' dya'a ulidzaro Diuzi gacalë Diuzi lëjë' utza'jë' pensari quiejë' hue quieyaquë' xti'idza' Diuzi.

26 Cana' re'ennan cuenda sujë' listo yerojë' lu'u trampa ga bdze' xan' taxi'ibi' lëjë' nacajë' preso ga hue xan' taxi'ibi' ta rnazin quiena conlë lëjë'.

3

Ni nan cabë' gaca quie yaca benë' caora bayeyudyi quie yedyi layu

¹ Reya'ala' inezo' dyë'ëdi cabë' gaca caora bayeguida Jesucristo, porque huata' tu zëdi zë gula lao yedyi layu.

² Yaca ben' inita' dza na', huejë' cuinjë' ben' zë, huaza'la'adyi'yaquë' dumi, uzë'yaquë' benë', utasi unioyaquë' Diuzi, bigaleyaquë' quie xuziyaquë', bibi bala'ana gapayaquë' chi nu benë' yeyëchi'la'adyi'në' leyaquë', bitzionla'adyi'yaquë' Diuzi.

³ Binadyë'ëyaquë' benë', bisi'zëyaquë' quie benë', gaoyaquë' benë' xquia rnayaquë' di'idza' falso, hueyaquë' con ta rnazin quieyaquë', hueyaquë' snia, bitzaxeyaquë' tadya'a.

⁴ Huazi'yaquë' bichiyaquë' yë', hueyaquë' con ganzi, rueyaquë' ben' huen cuinyaquë', huatzaxejë' huejë' ta rnazin quiejë', bitzaxeyaquë' ta re'en Diuzi hueyaquë'.

⁵ Rionla'adyi'jë' Diuzi najë', pero bë' nazijë', dan' birueyaquë' ca re'en Diuzi hueyaquë'.

Pues yaca ben' rue cana', bitzu'ulao'jë' tuže

⁶ Entre leyaquë' nita' ben' tzu'u lu'u yu'u quie benë' ga zu nigula rue median, ga zu nigula yu'u pensari mala. Raxe yaca nigula na' cabë' di'idza' falso na yaca ben' na'.

⁷ Tu rnabaziyaquë' ta ineziyaquë' chi nacan tali, pero bë' ruezijë' bire'enjë' inezijë' tali.

⁸ Birue quieyaquë' ta naca tali. Bitzu'uyaquë' pensari dya'a. Bë' nazijë' inajë' naojë' xneza Diuzi. Hueyaquë' cabë' bë' chopa ben' brujo dza

na', tu ben' lao Janes len itu ben' lao Jambres.
Leyaquë' biguleyaquë' quie Moisés caora
uzuyaquë' tiempote.

⁹ Pero yaca ben' inita' dza zaza'ra, lë'ëti'zi
hueyaquë' gan si'jë' benë' yë', porque huacabë'
yaca benë' nacajë' ben' tondo. Gaca quieyaquë'
cabë' guca quie Janes len Jambres dza na'.
Gucabë' yaca benë' uzu tiempote naca Janes len
Jambres ben' tondo.

Ni rguixogue' Pablo mazara Timoteo

¹⁰ Pero luë', dyë'ëdi banaolo' ruelo' cabë' ta
psëdia' luë'. Lëscan' ablë'ëlo' cabë' rua', rua'
tadya'a, zudyi'ilia' Jesús, rua' ca re'en Diuzi hua'
tacuenda gale ja benë' con cabë' rna xti'idza'në'.
Nezo' cabë' naca', naca' ben' zëla'adyi',
nadyë'ëda' benë'. Nezo' cabë' raca quia'
redzagalaohua', pero birusanla'adya'.

¹¹ Dyë'ëdi nezilo' cabë' psaca benë' në'ëdi'
bizinaquezi. Nezilo' cabë' guca quia' ciudad
Antioquía, len ciudad Iconio, len ciudad Listra.
Tahuala gula bedzagalaohua', pero gualë Jesús
në'ëdi' cabë' tamala gu'un yaca benë' huejë' quia'.

¹² Tana' nia' luë' yedzagalaocazi yaca ben'
re'en enao xneza Jesús. Úsacacazi benë' lëjë'
bizinaquezi.

¹³ Pero yaca ben' mala len yaca ben' huizi' yë',
tu dza tu dza ziojë' ruejë' mazara tamala.
Rzi'yaquë' yë', riogueyaquë' yë'.

¹⁴ Pero luë', bicha', bë quio' yugulute ca ta
bapsëdio', porque anezo' nacan tali, nuebë'lo' nu
ben' psëdi' luë'.

15 Nenacatio' xcuidi' uzulaolo' rusëdio' guichi la'ya quie Diuzi. Caora na' bzioñe'e Diuzi luë' cabë' reya'ala' huero sudyi'ilëro Jesús tacuenda gata' yela' neban quiero tuzioli.

16 Lao na'a Bichi Be quie Diuzi bënë' mandado bzu yaca ben' unita' tiempote xti'idzë' lë'ë guichi. Tana' nacan huen isëdiro xti'idza' Diuzi cuenda na'tera usëdiro ben' tula quien, tilarojë' chi bihuejë' tadya'a, uzioñe'erojë' ca re'en Diuzi tajë' huejë' puro ta yu'u ni'a xnezi

17 cuenda gaca yaca ben' nao xneza Jesús ben' laxta'o yëri, ben' raca rue yugulu tadya'a.

4

1 Delante lao Xuziro Diuzi lënë' zï'inë' Jesucristo, ben' yeguida lao yedyi layu como ca rey ta huenë' juicio quie ja ben' naban, len quie ja ben' aguti, rua' luë' mandado

2 ta quixogue'lo' yaca benë' xti'idza' Diuzi la'achi yeyula'adyi'jë', la'achi biyeyula'adyi'jë'. Uzioñe'elo'jë', tilo'jë', usëdio'jë' ca ben' rue zëla'adyi'.

3 Can' huelo', porque dan' huadyin dza bigue'en yaca benë' yejë' ta naca tali, pero huaguiloyaquë' nu yaca ben' usëdi lëjë' puro ca ta re'enjë' yejë'.

4 Huasebi'yaquë' di'idza' li quie Diuzi. Gue'enyaguë' uzënagayaquë' cabë' naca cuento quie benë'zi.

5 Pero luë', reya'ala' talao' tuzi ca pensari dya'a. Bigalelo' cati hue benë' luë' bizinaquezi. Du guicho du la'adyo' tzetixogue'lo' benë' xti'idza' Diuzi. Uzulo' di'idza' cabë' dyin ben Diuzi ruelo'.

⁶ Bagazi idyin dza gatia' yeya'a tzazua' ga zu Diuzi.

⁷ Ca dyin ben Diuzi bia', bia' tadya'a quien bareyudyin. Bipsanla'adya' xneza Jesús.

⁸ Caora na' udyia Señor quiero, ben' rchugobë' tali, tu coron guichoga'. Na' quele tuzi në'ëdi' udyia Señor quiero coron guichoga', lëscan' udyianë' coron guicho yugulu ben' rbeza yeguida Cristo, ben' nadyë'ë lëbë'.

Rnaba Pablo tu cule lao Timoteo

⁹ Huelo' dyabë' guido' idena'lo' në'ëdi'.

¹⁰ Apsanla'adyi' Demas në'ëdi', zeyonë' ciudad Tesalónica. Raxeranë' gaca quienë' ta de lao yedyi layu cala ca ta yega'nlënë' në'ëdi' niga. Na' Crescente zionë' tu mandado yu nebaba Galacia. Lëzi cana' ziorë Tito tu mandado yu nebaba Dalmacia.

¹¹ Ituzi Lucas abega'nlënë' në'ëdi' niga. Chi huu' cule, tzio' tzeguedyo' Marcos ta guidalao'në' niga, porque re'enda' gacalënë' në'ëdi'.

¹² Abia' mandado zio Tíquico ciudad Efeso.

¹³ Bë' bazao' ga zua' niga, yedelo' ciudad Troas tzazïu' gaban quia' ta nuca'na' lidyi Carpo. Lëzi re'enda' tzazïu' libro quia', pero racara purari tzazïu' documento quia'.

¹⁴ Alejandro, ben' rue dyin conlë guíba, lega psaquenë' në'ëdi' bizinaquezi. Pues hue Diuzi lëbë' castigo.

¹⁵ Gapo' cuidado conlë lëbë', porque lega ruenë' contra xti'idza' Diuzi rguixogue'ro benë'.

¹⁶ Caora tanëro bia' defender cuina' lao yaca ben' rnabë', nunu gucalë në'ëdi'. Yugojë'

psanla'adyi'yaquë' nē'ëdi' niga. Rulidza' Diuzi si'zēnē' quieyaquë'.

¹⁷ Pero gualë Cristo nē'ëdi', bēnnē' fuerza valor quia'. Bia' gan udixogui'a yaca ben' binaca ben' Israel xti'idza' Diuzi. Yujōjē' bzēnagajē' xti'idza' Diuzi udixogui'ayaquë'. Cana' gualë Cristo nē'ëdi' zē lasa caora cati guca zēdi quia'.

¹⁸ Pues huacalēcazi Cristo nē'ëdi' con bititēzi tamala gaca quia'. Nezda' gapanē' nē'ëdi' hasta dza huetzazulia' lēbē' guibá ga r nabē'nē'. Huero Diuzi ben' zē tuzioli. Amén.

Ni reyudyi di'idza' use'ela' Pablo lao Timoteo

¹⁹ Ugapo' diuzi Prisca, lēnē' Aquilo, len familia quie Onesíforo.

²⁰ Nia' luë' napca'na' Trófimo ciudad Mileto dan' raca zhue'nē'. Lēzi bega'nre Erasto ciudad Corinto.

²¹ Huelo' dyabē' guido' na'a zatzu'uraro biu' ruen zaga. Lēscan' rugapa Eubulo, len Pudente, len Lino, len Claudio, len yaca los demás ben' nao xneza Jesús, luë' diuzi.

²² Rulidza' Señor quiero Jesucristo ta sulēnē' luë' yugu dza. Lēscan' rulidza' Diuzi ta huela'iyanē' yugulule. Amén.

Xti'idza' Diuzi
New Testament in Zapotec, Choapan
(MX:zpc:Zapotec, Choapan)

copyright © 1986 Wycliffe Bible Translators, Inc.

Language: Zapotec, Choapan

Translation by: Wycliffe Bible Translators, Inc.

Zapoteco, Choapan [zpc], Mexico

Copyright Information

© 1986, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Choapan

© 1986, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Mar 2026 from source
files dated 29 Jan 2022
f44721e8-d767-55bd-8bcb-f1eb4965c7c2